

少師朱襄毅公督蜀疏草

少師朱襄毅公督蜀疏草卷之

卹陞鄰省仗節文武疏

欽差總督四川兼制湖廣荆岳鄖襄四府陝西漢中一
府軍務策應緩急督理糧餉巡撫四川等處地方兵部
左侍郎兼都察院右僉都御史臣朱燮元謹題爲特報
鄰省仗節之臣乞賜優卹以彰激勸事自逆酋奢崇明
父子造叛不惟全蜀被殘卽黔省切近衛所荼毒不可
勝言有如貴州永赤廳同知王胤昌處苗肘腋力不能

抗只得慷慨投繯全家屠戮不遺一胍貴州摩尼所千
戶張大策自賊發難卽舉義血戰衆寡不敵被賊綁至
教場碎剝以死貴州畢節衛掌印指揮裴有章當賊初
起首阻狂鋒堅城拒守已有勝形而沐兵乘夜撤回城
遂不保時文武有挺身就戮者有操戈陣亡者未盡查
出本官背城力戰身中八槍竟爲賊縛次第轉賣及到
烏蒙偶與部下小兵相遇抱持涕泣主文羅旻報土舍
祿祈母子捐銀贖取適臣差官來報卽懸賞烏蒙使之
送出於時死事教官指揮之子主長庚等三人同來見

臣不勝酸楚此外復有貴州赤水普市等所指揮百戶等官許世綬周應秋等皆自賊窟集兵舉義或潛或出百折不回臣集漢土之兵攻取永寧打破紅崖天臺白崖銅鼓諸囤而水西復發兵三十營扼險助敵霖雨一月等厚穴深塙糧不繼正在皇恐復思比輩爵萊吞蔽久不火食若不急救皆爲泉下人矣卽檄監紀保寧知府張翼軫遊擊范繼道多方招撫量分糧糗協力剿賊以報血憾又查遵義栢楊岡把守楊通霑原係三科武舉兩年死守賊屢犯而屢蹶儼然爲邊界長城何黔之

多材也道路隔阻往返耽延死者皆中蜀禍生者見爲
蜀用臣故不避越俎除移會黔中外特爲疏聞伏乞勅
下該部轉行貴州巡按御史再加覆查酌議分別優卹
以慰忠魂至於楊通霑屢立戰功應陞叅遊裴有章與
許世綬等應加守備職銜聽臣策令討賊建功事完優
議再照自永寧摩尼赤水白撒普市層臺共得朝廷頒
降印信四十餘顆與撫烏蒙鎮雄烏撒等事及善後之
策俱關鄰省止因道阻臣一面徑行切責擒酋集議善
後明白之日方得移會兩省具題外理合一併預聞爲

此具本謹題請旨天啓二年五月二十七日上奉聖旨
該部知道

亟議陞擢材官疏

題爲材官屢戰建績亟議陞擢以示鼓舞事臣自去歲移駐戎州二逆連結諸苗無一月不數戰各將領不以信地爲詞則以疾病藉口諸凡奮不顧身摧堅陷陣者多係加銜材官時日已久轉入轉深功多不賞無以示勸除張邦紘林兆鼎范繼道薛來衍鄧懋官等官俱係實職劉養鯤羅乾象張令黑茂范祖文胡肇虞鄒蔚然胡汝高鄢玠袁可成等俱經授過職銜應候總叙外先是臣因賊鋒甚銳急下令有能先破一陣者除照例頒

賞外卽具疏請授松潘叅將見缺行據各監軍道所報
瀘衛五大戰直入永寧則秦翼明秦拱明秦永成秦可
等之功爲首勢難爽信青山崖麻糖坎二戰則加銜守
備李維翰李棲鳳納尚勇等奮勇前驅竹洞龍透兩大
戰則潘映奎陳坤袁戎李國選余權中易三桂會遐中
王懋官周良材等竭力死戰蘭州土城二大戰則譚正
修譚正常譚正通范鉞羅萬象洪綱鄒昌祚與中路宣
撫司覃懋勳等殺級甚多且擒斬水西魯仲賢各首級
去歲高琪之戰與賊相持四十八日逐賊宵遁則孔全

斌曹守爵曹有才姚化民舒遐劉有良等大有膽略遵
義屢屢抗賊則陳一龍駱麟侯良柱李棟袁鏊趙文進
與投降羅安良羅華趙國璽雷震乾安鑾等其功難泯
預燒古蘭招降極多則畢應台范寵劉誥朱朝聘等謀
勇兼資督陣官則武聲華楊元范世賢蔣繼祖何湛然
久在軍中備效勞績均應亟加拔擢以資撻伐內秦翼
明因父秦邦屏死難見授都司原非土司屢次功績未
叙查松潘管副總兵事叅將魯美中已經題授標下中
軍所遺員缺合無卽以秦翼明實授叅將填補荒邊積

弛可與整頓此外如秦拱明陳一龍侯良柱應授以叅
將職銜潘映奎王懋官秦永成秦可譚正修譚正常譚
正道覃懋勳駱麟袁蓋應授以遊擊職銜趙文進李維
翰曹守爵陳坤袁戎周良材舒遐畢應台范寵劉誥應
授以僉書職銜范越羅萬象范世賢蔣繼祖李棲鳳李
國選余權中易三桂曾遐中曹有才姚化民李棟劉有
良納尚勇洪綱鄒昌祚朱朝聘羅安良羅華趙國璽雷
震乾安鑾應授以守備職銜各給憑劄聽道將分布率
兵討賊守備武聲華應以原官改補遵義道下中軍戎

都後衛指揮楊元應陞守備補威茂道下中軍灌所百
戶加銜守備孔全斌應陞守備補監軍劉僉事下中軍
加銜守備何湛然應陞守備補監軍盧僉事下中軍其
餘各官候另查叙勸酬理合具題伏乞勅下兵部覆議
上請行臣衙門轉行各官領兵任事庶勞苦知勸後効
可期矣爲此具本謹題請旨天啓三年五月二十七日
上奉聖旨兵部知道該本部覆議秦翼明量陞叅將職
銜管四川松潘地方副總兵事其原推張景房另行改
用范世賢加都司職銜事平推補其秦拱明等酌量給

劉奉旨是

褒旌蜀藩捐助疏

題爲蜀藩捐餉助守功高保障懇乞賜勅褒旌以勵忠
賢事先是逆賊奢崇明父子突謀不軌虐焰滔天自重
慶被占之後所向披靡築長圍而犯省會城中逃徙過
半百無一備勢已岌岌矣乃王獨積柴以自誓募兵以
助守精忠大義寔式靈於鬼神而且念臣等之困日日
授餐時時下問甚至鹽菜木植一切瑣細之務無不取
給隨請隨發四門俱遍總計所助銀并器皿共二萬八
千三百二兩九錢金三千一百九十四兩二錢折銀一

萬九千一百六十五兩二錢米一千七百八石九斗每
石價銀一兩共該銀一千七百八兩九錢通共筭銀四
萬九千一百七十七兩夫租稅剩物社稷大計利害之
際原是曉然而深宮隔絕耳目易壅自非超然遠覽其
孰肯卻患貧之私圖而爲急公之至計故輿論翕然謂
王天下之賢王也若夫太平王至淶汶川王宣驪獨不
遷徙日在城頭奔馳防範東各捐銀俱二百兩有奇此
亦抱慷慨之奇節懷篤斐貞心者矣迄今仰賴天威
危而復安而賢王忠赤之捐濟之誼通國有口無不

感頌該臣會同巡按四川監察御史張論議照得蜀王立德惟貞爲善不倦積柴塞戶凜大節於瀕危募士捐金保危城以無恙功高藩翰例合旌揚查得播事軍興蜀王發祿金二千兩米五千石助餉題奉明旨建坊優禮而前百日之苦數萬之助搜括無餘勤勞更倍伏乞勅下禮部查例覆議特賜勅諭褒嘉仍破格旌異以勵天派至於太平王汶川王查照往例一併旌表以重親親之典仍容臣等備辦花幣羊酒恭送王門以彰盛典統候聖明裁定行臣等遵奉施行爲此具本謹題請旨

天啓三年六月初六日上奉聖旨覽奏蜀王捐助多金
城守允賴功可嘉尚併太平汶川二王俱奮力輸貲均
宜褒勸著該部卽從優議奏該兵部覆奉聖旨是蜀藩
忠勞茂著着差官齎勅褒獎還賜白金二百兩文綺十
端地方官著卽與建坊其太平汶川二王併專勅獎勵

議調才望道臣疏

題爲議調才望道臣料理軍務事重慶重地幅帽千里
殘破之後民困已極兵巡上川東道副使徐如珂一面
料理緩輯瘡痍一面監紀仁懷兵務見住土城屢建奇
功方慶得人今聞邸報已陞太僕寺少卿旣已內召不
便議留軍旅重務亟需異材卽新推有人未能遽至查
得分巡川北道右叅政閔夢得久在行間衆心所附除
行帶攝外爲照本官自天啓二年八月內行委納谿監
紀鎮定於逆苗披猖之日鼓舞於士卒逃怯之餘諸寨

俱以身親降人罔不心服又分遣死士出奇用間入永
燒蕩厥功稱最卽今招徠十萬擒斬數千真經文緯武
之雄材而鞠躬盡瘁之苦心也叅之勘敘常列自應破
格超陞但二逆在逃未能去兵而渝州殘郡更資整頓
合無以本官加陞四川布政司左布政使仍兼臬銜管
兵巡上川東事務卽代徐如珂監督該路之師直入鄂
家渡過河擒酋併措置糗糧協濟遵義一路庶撫民振
旅於地方深有裨焉臣謹會同巡按四川監察御史張
論合詞上請伏乞勅下吏部再加酌議將閔夢得加陞

左布政使兼按察司僉事管理兵巡上川東道事覆請
行臣轉行本官遵照任事施行倘前缺推補有人亦卽
改補分巡川北事體甚便爲此具本謹題請旨天啓三
年六月初六日上奉聖旨吏部知道該本部覆奉聖旨
是

保留給由府佐疏

題爲保留給由府佐官員事據四川布政使司呈奉臣
批據東川軍民府通判馬學魁呈稱卑職見年三十八
歲陝西漢中府寧羌州人由選貢云云呈乞照例會題
并開具稱職考語呈詳到臣該臣會同巡按四川監察
御史張論考覈得東川軍民府通判馬學魁精神堅定
才具疏通督援素効勤勞撫荒共歌安堵稱職及照府
佐給由例應赴部但今蘭酋逋匿本官正在納谿分理
餉務難便離任該司乞要保留相應照例題請除批行

本官照舊帶俸管事外伏乞勅下吏部查果與例相合
准令本官免其赴部止造冊齎繳本部再加考覈題請
施行爲此具本謹題請旨天啓三年六月初六日上奉
聖旨吏部知道

塘報擒斬招降功次疏

題爲塘報擒斬招降功次事據監紀叅政閔夢得副使李仙品僉事劉可訓總兵李維新塘報奉令自天啓三年六月初一日起至二十九等日發將官范繼道林兆鼎劉養鯤等率兵招撫一面攻打負固寨隨據回稱陸續招降猪嘴木姜牯牛等固洞寨大頭目楊雄郭寵祝義明阿尹喻訓等三十六名苗夸男婦二萬八千八十五名口攻打黃泥鍋底斬功二十七顆生擒僞總兵二名苗羿十三名俘獲十二名牛馬四十九隻匹賊寨

及積糧二萬餘石盡行燒燬拏獲奢寅差苗顧友仁供稱二酋逃往龍塲壩近水西地方木閣箐劄三十營頭日扶國禱羅用只打麥奧單等西兵救援等情又據仁合一路監紀叅政王世仁副使徐如珂僉事盧安世塘報據叅將薛來衍羅乾象等報稱統兵陸續招降大寨寶瓦麻窩等洞寨頭目阿強易布等十二名苗民男婦一萬四千一十五名口攻打蝦蟆鬼妖等洞寨斬頭目偽千總二名苗級一百六十三顆生擒九十八名口俘獲十二名口牛馬六十三隻匹衣甲馬鞍槍刀弩箭一

百四十四件將奢酋祖墳及崇明母墳盡行掘挖賊目
羅用家丁三人自龍場壩走出供稱酋父子俱在龍場
客仲霸日間相見夜間各不知所往又與水西家歃血
助兵四營同把河口差人往各土司商議見在鑿板造
船搭橋等情又據遵義一路監紀僉事趙邦清塘報據
加銜叅將侯良柱陳一龍等報稱奉令合營率兵陸續
招降苗漢楊黃三元等寨頭目楊守江趙懷忠歐燦等
九名苗民一千八十六名口攻打木園馬湖等營寨斬
獲頭目一顆苗級五十七顆生擒八名俘獲二名槍刀

器械二十六件趙僉事於初十日進遵義城內分布等情又據真綏一路監紀叅政吳國仕塘報據原任綏陽縣監總知縣任寵報准叅將陳一龍報奉本部院令催赴擒酋同王尚明等至竹把招降鹽井九倉等圍寨偽軍師王國才及頭目王朝臣等二十八名苗民男婦三萬餘名口攻打三鍋莊等寨斬獲偽元帥奢者梯偽總兵奢阿東等首級五顆苗功四百一十三顆得獲牛馬六隻匹槍刀絮弩一百五十八件溺河死者無筭各等因塘報到臣先是各路官兵攻剋新寨木脚古蘭擒斬

水西首惡魯仲賢羅奇等已經塘報隨傳檄各路大小將領多方偵賊乘勝速入擒酋一面撫定巢穴黨羽務期底定相機戰守以副萬全去後今據前因除行各路監軍道將多方安插壯者籍入軍伍功次驗明給票生擒餘候獻俘外該臣看得蘭穴與水西鎮烏爲鄰實有三窟自羅乾象大勝於古蘭二逆遂隨水西敗卒寅夜渡河走入龍場客仲壩屢據偵者報稱出沒不常隨從惟扶國禎羅向宸等數輩細查地形正枕大方之後離永寧已二百餘里峭崖插天深洞無底蓋洪荒未闢之

區非人跡所易到也禍本未殄竊發可慮臣非不欲旦暮擒縛以竣此局獨是道遠箚深實難輕率况水西居爲奇貨我兵若一渡河非惟救蘭實欲自救官兵以數月無糧疾疫大作庚癸莫應只得聽其散去據總兵李維新塘報已減十之四五天又降大疫死者如麻洪水大發沿江居民之漂流者不可勝記看此光景進退維谷只得分布各將據險固守乃一面鼓舞白沙普市赤水畢節等處被害之民量助銀米合哨傳塘相機擒剿遲速之期殊難預定臣患病委頓勢已阡危除另疏陳

乞理合塘報伏乞勅下兵部案候事寧一併敘錄施行
爲此具本謹題請旨天啓三年七月初八日上奉聖旨
兵部知道

亟議加派兵餉實濟疏

題爲兵餉久匱勢難撐持亟議實濟以救艱危事據四川布政使司呈奉臣紙牌行司會議加增兵餉該本司左布政使林宰會同按察司按察使李守俊兵巡川西道副使吳光義議照蜀民之疲敝極矣征戰者劬勞於野罄餅者抱嘆於室兵興三年止以預徵摻括爲權宜補湊之計並未加派民間分毫夫亦大有不忍也今者犁庭掃穴之法已聲黨羽又多降伏而逆寅父子尚匿龍場結連水西應援思爲捲土重來之計是遽可安枕

哉辰下十餘萬衆之雲集日費千金無餉無兵仍復有賊矧邊餉那移已極戍士庚癸頻呼帑發已盡楚兌不至本部院穆然深維弘此遠畧不得不議及加派九有血氣同此心知一勞永逸誠非獲已除威茂汶保屏山不徵遵義原係新疆止足供本府經費况又殘破見在集兵不派長筠高拱興文居首肘腋屢經破殘委難議加瀘納江合宜賓南溪爲賊出沒均當減免其餘經賊破劫州縣量徵二分之一未經被賊州縣每石量加銀六錢米三斗合候詳允通行所屬開徵完日造冊開銷

使士飽馬騰蹶渠魁以奠地方生民得安業於旦暮矣
等因呈詳到臣除批行外該臣會同巡按四川監察御史
張論看得川民遭焚劫之後又有轉輸之苦流離未
遘瘡痍莫問沿江一帶率拋棄不耕又兼時疫盛行水
災漂沒悲慘之狀不忍置目假令淮陽之倉可矯丹陽
之舟堪助臣卽蹈國法亦所甘心忍復椎膏吸髓派之
額外乎顧財寶有數兵難游饑探囊旣窮點石不化當
九仞一簣之時不爲一勞永逸之計異日責臣漫無籌
筭臣罪又大矣今日惟有請發帑請兌解請加派三策

耳倘皇上俯念西南半壁血戰三年再施曠蕩用救陞危或戶部仍依前檄行楚照數起解不爲虛言此則鬻桑之壺殮大旱之甘雨蜀之大幸臣之上願若其未可必得則不得不再索之窮民以濟急用據議每糧一石加派銀六錢米三斗又將衝邊殘破經賊出入焚劫州縣議免議減分爲三等追徵分濟似亦衆輕易舉倘二賊旦暮得縛則所派者卽充爲正項照數扣抵免徵通候事完另委監司一員查覈造冊報臣備移部科開銷外理合具題伏乞勅下戶部再加查議覆請行臣遵照

施行爲此具本謹題請旨天啓三年七月初八日上奉
聖旨發帑併催解協兌銀兩已有屢旨了該省額徵錢
糧酌量濟用派加不得輕議該部知道

請勅專官督理錢法疏

題爲遵例請勅專官董理錢法事據四川布政使司呈
奉臣紙牌照得蜀中民窮費巨生利之孔已竭近奉明
旨兩次議鑄銅錢行使誠爲救時良藥自應請設精明
監司一員開局董理庶便責成牌仰該司官吏會同按
察司卽查相應道官作速通詳坐局料理與銅作何收
買錢作何鼓鑄通省作何行使奉行勤惰作何勸懲工
本還官外贏餘之息作何設法解京以佐遼餉官司罪
贖收銀不收銅錢作何立法叅拏造錢抵兌數目年終

造冊開報以便送部查閱舉劾總之法行則錢行上用
則下用俾錢利流通民知實惠本部院於此殿最諸吏
願諸司慎而行之速速等因奉此又蒙巡按御史張論
牌同前事蒙此俱經備行成都府查議去後隨據該府
知府許士奇看得鼓鑄一節此周官九府之成規而管
敬仲已試之明效也立法之不嚴錢所以自壅也民間
交易一兩以下者純用銅錢一兩以上者銀錢兼搭畧
做保甲之法互相稽察不受錢者定罰無赦而後錢可
行矣夫官民之異用錢所自壅也必除京邊錢糧而外

各官俸薪師生廩餼衙役工食贖緩事例一切收錢而後錢可行也至於錢本暫借公帑錢式俱照京樣州縣赴府搭鑄舊有定議特在一申飭間耳若夫專設一道請勅以重事權酌量才品分委以司稽覈自有憲裁非本府所敢擅議也等因由詳據此該本司左布政使林宰看得周官理財創圜府之法漢室中興餘都內之金錢法之有利於人國大矣蜀今何時元愍未殊干戈旁午十室九空下貧無兼辰之業中軍闕宿飽之需錢法一行所謂化無用爲有用足國裕民計無踰此第保寧

重慶緝鑼並用行如流水至若成都且土苴視之矣上下之間官民灌輸而錢可行矣買銅鑪鑄容本司漸次辦置外查行錢之法上必有監司一員主持下必有府佐數員以司分理必有其真心體國精明有計者方能稱其任本司守西道旣以齋捧起行四道俱在軍前監督茲議添設一員其間本官俸廩公費吏書阜役之供給工食從何設處是謂得一錢之利而先糜萬緡之費必不便之數也查有巡西道副使吳光義英材掣電驅霆峻節干雲插漢覈利弊洞如觀火嚴貞肅穆如清風

且在會城之中更屬臂指之使今歷俸已及一年六箇月矣合無加銜叅政仍管巡西道事使之專理錢法所謂用一官卽得一官之用增一官不見一官之費莫有優於此者其分理各員則於開鑪處所簡其府佐之廉明有材者令之分理一應鳩工辦置開造等項聽該道任事時酌議則印斜之咎皆將開爲金穴而凋瘵之民或可登於富庶矣等因呈詳到臣除批行外卷查先准工部咨爲蜀省錢政已行錢法當飭謹條疏上請仰祈聖鑒特賜嚴旨勅行以貽三川永利事該四川前巡撫

今陞南京兵部右侍郎饒
題前事本部覆奉聖旨
錢法流通國儲可裕依議行該省及各省直撫按官一
體著實舉行欽此又准工部咨爲殘遼難救敗形固圉
須求長策敬陳一得以佐廟謨事該南京福建道監察
御史陸
題前事本部覆奉聖旨是欽此又准督理
京省錢法戶部王右侍郎咨爲宣九重之德意酌五事
之芳模懇乞聖斷力行以新錢筴以濟軍儲事該督部
題協佐錢法江西清吏司主事湯
案呈前事奉聖
旨這鑄錢事宜著卽與議行本內藏銅七萬斤已經御

用等監討用該部知道欽此又准戶部咨爲通行制寶
漸減遼餉懇乞聖明嚴勅天下撫臣責成道屬軫恤民
隱以開利源以固邦本事該本部督理京省錢法右侍
郎李○題前事本部覆奉聖旨錢法裕國便民公私交
利道所奏各省直鼓鑄事宜著行各巡撫官一體遵行
京局所鑄大小制錢著遵前旨每季奏進五百萬文以
供頒賞等用庶得上下流通之利餘俱如議覆行該部
知道欽此又准督理京省錢法戶部李右侍郎咨同前
事准此又准戶部咨爲蜀地殘破堪憐逆酋剪滅難緩

等事該湖廣道監察御史溫■題前事本部覆奉聖

旨是欽此欽遵備咨前來准此俱經牌行布按二司查
議去後今據前因查得錢法一事該前撫臣饒■條
議具疏上請奉有明旨業行布政司設局鼓鑄而成都
之民頑梗不奉法旋值賊變益以廢闕今當萬分艱窘
之時別無纖悉生財之孔况道路少疏滇銅漸出而蜀
又自有銅穴足供採取則行錢一事實救蜀之急著也
惟是積習相沿弊孔疊出自非專任責成猶然故事耳
該臣會同巡按四川監察御史張論看得兵巡川西道

副使吳光義八面曉暢之材一介森嚴之操自聞難叱馭當省圍初解之時招流輯暴措兵理餉補葺月城懲治叛卒事事綽有成效以之理錢就近加銜事權兩便但事在藩司合加以四川布政司叅政銜專理錢法兼管巡西事務庶便責成至於先借帑銀買銅鑪冶開鑄分理府佐兼督務令全省上下流通毋容阻滯州縣等官廉其用舍舉刺勤惰其工本贏餘解京等項未盡事宜悉聽本官任事後次第照款修舉理合具題伏乞勅下該部覆議將副使吳光義加陞四川布政司叅政

督理錢法仍管巡西道事務照例撰給勅書與應得事
宜頒發前來責成本官通行所屬立法嚴行年終造冊
報臣以憑具奏倘績懋功成照例擢用施行庶人與法
相習而艱窘獲有少濟矣爲此具本謹題請旨天啓三
年七月初八日上奉聖旨吏部知道該本部覆奉聖旨
是

嚴究邊軍鼓噪盜弁疏

題爲邊軍挾糧鼓噪旋即正法嚴究盜弁以肅軍政事
天啓三年五月二十七日據四川布政使司呈准松潘
兵備道牒呈本月十七日申時據疊路把守指揮劉待
聘報稱松兵發血牌一面上書奸賊張應甲戴尚登等
冒領糧餉坑伊二載錢糧不蒙放散今會漳臘威茂各
鎮軍兵歎血盟誓至敘等情又准署副總事僉書孫宣
手本據鎮城軍丁李貴林等訴稱張應甲等侵餉情詞
准此該本道僉事翁登彥看得松餉告匱已三載矣荷

發萬金竟入盜弁之橐而反名羣喙之鳴無端僞牌彼謂死饑死法等耳第敢假官弄兵血淋於傳牌之上無將之誅難宥久枵之腹當憐乞發數萬少爲濡沫不惟保全危鎮而再造本道匪淺解等因到司該本司左布政使林宰查得松鎮額糧先苦援遼係軍前支用近因張應甲屢次赴司告領不得已支一萬兩給文解該道放散乃應甲匿文不解啓鞘侵分今昭噪聚之情非真有他意不過爲索餉計耳同日又據松潘道詳報相同該臣檄行司道嚴諭解散毋致滋蔓又經差官行查是

何軍丁敢於操戈鼓噪務擒爲首之人正法毋容漏網
及行按察使將張應甲拏監外隨據布政司回報奉檄
馬上移文該邊隨准該道牒呈准松潘署印孫僉書手
本爲擒獲首惡正法梟示事乃軍陳閩等指以欠餉把
持造反本職先借助生員商民每名給銀四錢續因巡
捕指揮汪起鰲將軍兵牧放牛馬踐踏猓苗捉收監禁
卽於十七日各軍在於教場宰牛歃血欲先殺鎮城各
官次劫商民圍困成都如一軍不從先殺全家本職急
傳管操儒學等官與商民捐俸再出一月餉銀給散聞

本月二十一日三更陳閏等沿街劫擄大亂幸各營千百總奉令捨命於二十二日擒獲倡亂首惡陳閏劉允成丁何禮睦華吳葵陽五名孫僉書會集該邊文武士民請令告天梟示訖田興李仕鰲等二十四名各細打一百監候有功員役當備花紅銀四十兩獎賞訖乞報部院請賜正法准此又據松潘掌印指揮謝啓源吳繼業等經歷陳道訓導劉必明監生徐佳胤等具呈張應甲羅三等截餉生端陳閏等藉此鼓噪孫僉書只得借令汪起鰲出銀五十兩充作牛酒猶然作亂幸六營四

所千總旗軍將首從俱擒少紆院道之憂等情報道據此該本道看得松鎮兵丁素稱驕悍贅癆本營凡肉士民近以餉運愆期借名起釁本道撫慰再三各官代措已竭蓋實念翳桑之禍色不忍加膏斧之嚴誅也詎意陳閩等始託噴張應甲之目支糾盟歃血繼興疑汪起釁之道揭偽牌倡逆按其反狀一磔尚有餘辜若非鎮所各官奉院道之令奮勇協擒全鎮蓋岌岌矣陳閩五名當已梟示田興二十四名伏候憲法其餘脇從准其自新若夫各官旗甲決計擒拏俱應薦獎賞勞等因移

司該本司林左布政使看得松潘一鎮地苦寒而不毛
各軍驕悍而難馭自首難以來邊餉大半爲援遼援兵
戰兵移用元年二年積欠二十餘萬無可支發其在三
年且未論也蠢蠢思動非一日張應甲以該道中軍守
備領餉一萬沉匿公文擅自瓜分陳閏等忿憾不甘又
汪起鰲道揭公然倡亂搶劫又經發餉三萬論戢解散
陳閏等該鎮臬示田典等棍責餘皆解散皆本部院遠
畧震懼致之也張應甲屢孽當懲以法有功官旗宜加
獎賞以靖邊圉等因覆報到臣該臣看得蜀中邊餉半

爲援遼所借且兵連二年那用更多先是布政司開欠
一百餘萬已經揭報部科訖松潘悍卒陳閏等積惡逞
兇久欲蠢動而中軍守備張應甲復敢領銀私分以激
衆怒遂爾軟血教塲聚衆大噪擅傳僞牌血跡淋漓因
而搶掠街市全無法矣幸各官懼禍鼓勇擒斬不動聲
色卽就底定在僉事翁登彥就近帶管威信素孚僉書
孫宜甫行接署新到地方倉卒定變皆可補過其他擒
捕人員容臣分別獎賞以示勸勵陳閏等五名已經梟
示田興等二十四名行令查審分別正法餘黨悉行宣

諭免寃以銷異萌外事干地方理合具實報聞伏乞勅
下該部覆議上請將張應甲行巡按御史查明依律寃
治遺下松潘道下中軍守備員缺另行推補庶法行而
人知畏矣爲此具本謹題請旨天啓三年七月初八日
上奉聖旨該部知道兵部覆奉聖旨是

地震疏

題爲邊方地震事天啓三年七月初二日據威茂帶管
松潘道僉事翁登彥呈稱本年六月初七日據松潘南
路平番守備許應元報稱鎮平堡於五月二十六日未
時地震有聲由南而來正北而去擬合轉報據此七月
初十日又據該道呈准松潘署副總事都司僉書孫宜
手本報據小河所申報五月二十六日乙卯值收亢宿
管事申時分忽地震如雷自西南方而來至東北方而
去人民驚怖椽瓦大脫房屋動搖牆壁傾倒等因到道

准此該翁僉事查得邊方多事災異不常嚴行文武勉盡職業防禦番徠以備不虞外合行呈報等因到臣該臣會同巡按四川監察御史張論看得蜀中災沴徧野瘡痍未起該邊苗賊出沒尤號重地乃鼓噪甫戢而地復告警變不虛生良由人事感召臣等拊膺大息消弭無術除待罪修省行該邊大小文武各官嚴加隄備巡行守禦以弭災異外事干地方理合具題爲此具本謹具題知天啓三年七月初八日上奉聖旨禮部知道

四次請告疏

奏爲危疾再發重任難勝乞賜休致以遂首丘事臣庸
愚黯淺不堪軍旅因變承乏誼不獲辭乃不意狗馬之
疾日以增加去歲痰火眩暈動履艱難已經兩次陳乞
未蒙皇上俞允復加寵命責臣討賊臣感激天恩誓圖
死報遂復勉就醫藥扶掖受事豈期今年五月十九日
停舟納谿河下穢氣薰灼頓患嘔泄不省人事只得暫
移瀘州調治一月之內三次倒絕期屢發而近病屢入
而深手足拘攣飲食俱廢延醫劉加相診視謂脈弱苦

不對症不敢下藥益用悲感僵臥不能展轉臣身如鴻
毛何足爲言而皇上羈土重任豈可耽悞今二逆遁入
水西出沒無定路險筭深實難下手顧蜀境不啻廓清
卽黔界亦已開通數百里此必須精力有餘相機調度
方可了此而臣不幸病在膏肓有心無力卽溘死有餘
恨矣情真勢迫萬非假託伏乞皇上憫念特賜休致別
選材望速行交代或就於本省監司中推用免臣守候
倘自此得少延視息歸正首丘高天厚地豈有窮恩臣
不勝悚息待命之至爲此具本謹具奏聞伏候勅旨天

啓三年七月十五日上奉聖旨蜀難將平逆酋未獲朱
爨元猷勞已著正賴調度剷除著用心任事不准請告
該部知道

請調補遊擊并中軍咨

爲請補衝邊將領以資保障事查得建南處蠻瘴之鄉
會川鹽井等衛屈在極邊近日滇路疏通尤苦多事所
需賢能將領不可一日缺者原經補有遊擊周基命因
在援黔久未履任若候黔事結局未審何日松潘道中
軍傳宣鼓舞最宜得人今守備署都指揮僉事張應甲
以私分餉銀事犯已經另疏具題拏問尤當揀擇填補
以安衆心查得原任雅黎遊擊黃承爵臨事好謀見危
不避當逆賊困城通省見任將領衰如充耳而本官以

軍政論罷之官獨率高揚董卜之兵挺身透圍不避兇
鋒所建功績已在前總督今御史敘疏之中卽今委署
壘茂賞番輯亂綽有建立將材寔難不可中廢合無仍
以遊擊頂補周基命員缺松潘衛指揮僉事吳蓋臣久
習邊事苗猱信服前歲隨段同知破圍援省英風百倍
斬戮多功見經勘敘應陞守備補張應甲員缺又查鎮
遠營根本之地自職連年東下中軍官隨行軍伍單弱
欠失操練近據守巡川西二道詳稱應照部例凡有應
改守備員缺查出者補請以松潘衛指揮報陞雲南蠻

哈守備徐之龍改補亦屬固本之籌合無請乞本部卽
賜具題黃承爵仍以遊擊填補周基命員缺吳蓋臣陞
守備補張應甲員缺徐之龍改鎮遠營練兵庶賢勞知
勸地方行伍得人其蠻哈衛守備員缺另行推補候俞
允之日各照地方填給憑劄咨職衙門以憑轉發各官
任事施行天啓三年七月十五日咨兵部該本部題奉
聖旨是

五次請告疏

奏爲病勢危篤軍務廢弛仰懇天恩亟賜允放事臣才劣不足當大任命蹇無以當隆遇病魔轉展日就沉痾前七月十五日痰火陡發昏暈倒絕已成痿廢之軀莫必旦夕之命業經披瀝苦情伏枕叩頭差承差朱之貴上疏陳乞去後倘勢可強捱其敢再控乃不意八月初二日未申之間忽然眼目昏黑痰氣上壅脈伏氣閉不省人事至初四日辰時稍轉而神亂語澁全無知覺臣卽倖偷一息已爲廢人况朝露危殘時刻難待呼天則

九重之高思親且萬里之遠臣之方寸久枯一息垂斷
狗馬之軀過此更不知何在矣且賊方潛避功可倖成
臣不避難於兩年之前而獨求退於垂成之際自非至
愚定不爲此無奈情迫勢窮萬不獲已每惟聖明可爲
忠言不得不仰天而呼也爲此冒昧再控伏乞皇上矜
臣狂愚憐臣危篤特准致仕回籍別選才望前來任事
使殘廢病軀不悞封疆大事雖死之日猶生之年臣無
任激切所懇悚息待命之至爲此具本謹具奏聞伏候
勅旨天啓三年八月初六日上奉聖旨總督重任朱燮

元已有旨諭留何又連疏請告著照舊任事不得再陳
該部知道

府官加銜致仕疏

題爲府官思親情切憂病轉深乞加監司職銜俯准致
仕事據夔州府申准本府知府胡大年關稱職於天啓
三年三月初二日接家書職母因思職舊疾舉發每一
號哭輒爾仆地移時方甦職聞之心魂飛揚不自知其
身在人世也蓋職母以逾七望八之年夙有冷塊之疾
每憂卽痛楚每痛卽昏暈職在家時延醫調治痊可方
出補官今乃故病復作衰老人那堪此苦楚鬱抑耶總
之爲思職之故是職爲一官以遺母憂增母疾蓋載間

何用此不孝之人乎職謏劣無狀日夕冰兢忽聞此音
方寸已亂伏乞俯賜具題放歸早得見母一日庶省病
母一日之憂而楚蜀要途不致因人廢事矣等因由詳
到臣該臣批該府長材粹履倚任方新王事靡盬不遑
將母何得遽動歸與之念速寢之復於本年五月二十
四日又據該府中爲孀母疾病關心重地菲庸難任懇
乞俯憐斥逐調理以延母子餘生事竊念人臣以致身
爲義人子以事親爲經職守夔關敢不竭力而無奈孀
母之抱疾也職自萬曆四十八年正月十八日赴京補

官不而慈顏者三年餘矣往固善飯今每食不滿一盂且每每忿及於職卽眩暈仆地夫眩暈而甦省尚可加調攝之方藉藥餌之力倘不然也嗟何及矣職自聞信之後方寸憤亂寢食靡寧當此多事之秋可使憤亂者冒昧隱忍肩此重任哉前已哀陳恭蒙勉留敢不矢效犬馬以圖報稱惟是母病豈人子所可貌言世固未有遺親而能忠君者陳乞早賜發還歸省則母子未盡之天年皆大造所延衍也感佩恩施闔室共之奕世共之矣等因由詳該臣批夔門重地本官整頓甫及一載別

親未久何故頻求歸養仰安心任事切勿再陳繳又於
本年六月二十四日據該府申爲孀老母病關心孤危
極邊多警懇恩斥放以延殘喘事職謬以菲庸自汴調
蜀感激洪恩勉圖任使如緝奸細催船隻押兵將置火
器散月餉練鄉保捕逃兵修城垣督發土司覃寅化等
并南岸各兵一萬二千餘員名設法催給行糧銀兩安
撫驛遞嚴緝生釁構端之輩罔敢不竭心力又何敢自
顧身家惟是邊塞之夫認真做事罪過多端靜俟顯黜
忽於本年五月又接家信云永昌餓兵無糧於二月十

五日夜糾衆吶喊樹旗放砲市肆搶掠無遺連日尚未服帖老母幾被嚇殞闔室各自逃生職聞之魂不附體心旌如搖舊有怔忡之疾陡然復發自謂調理或可供職然母思子子憂母方寸已亂豈能復供簿書之役效兵食之力哉夔關何地乃以庸病之人膺之瘵曠可虞憂危日甚職母子不足惜如地方何萬不得已冒昧再訴祈懇允放則母子自今以往之年皆恩賜矣等因由詳到臣據此查得大明會典內開外官在任患病務由撫按官題允查明方許回籍如不候擅回者革職爲民

等因遵照今據前因除批行外該臣會同巡按四川監察御史張論看得夔州府知府胡大年雅負揮霍之才力肩煩劇之任時方倥偬正藉勸勤乃因母病日篤歸思轉深陳乞至於再三至情自當體恤又經按臣移會前來合無准令回籍終養或以近有核敘之功俯照遼東萬有孚例量加監司職銜以示勸酬伏乞勅下吏部覆議上請將胡大年准其告病就便終養回籍俟另日於多事地方照新銜拔用爲此具本謹題請旨天啓三年八月二十一日上奉聖旨吏部知道

縣令給由疏

題爲遵例考覈給由官員事據四川布政使司呈奉臣
批據彭水縣申准本縣知縣施恩典關稱見年三十三
歲雲南雲南府昆明縣籍廣西桂林府全州人由舉人
萬曆四十七年八月內除授今職本年十二月十七日
到任扣該天啓二年十一月十六日連閏歷俸三年任
滿浦江縣申准本縣知縣高麟游關稱見年三十一歲
直隸廬州府合肥縣人由選貢萬曆四十年十月內除
授廣西桂林府靈川縣知縣四十一年三月二十一日

到任四十二年十月十二日丁父憂計歷俸一年零六箇月二十一日服滿赴部補授浙江景寧縣知縣四十五年十一月初三日到任至四十六年六月二十九日丁母憂連閏歷俸八箇月零二十六日服闋赴部復除今職天啓二年四月十一日到任扣該本年十二月二十四日連閏通前實歷俸三十六箇月三年任滿例應給由照詳俱奉批仰布政司查報奉此又蒙巡按張御史批同前事俱蒙批布政司查報蒙此行准按察司守巡監法等道各咨牒回稱查得二官委於前項年月日

期到任歷俸考滿任內徵收錢糧鹽課清勾軍伍積貯
稻穀五事實政俱已足額修舉委官盤量無異應准給
由各開具經薦稱職詞語起送到臣今據前因該臣會
同巡按四川監察御史張論考覈得彭水縣知縣施恩
典才情周慎操履端嚴督餉迅若風行借署恩同慈戴
蒲江縣知縣高麟游精明莅事豈弟宜民一庭皎月溶
溶百里谷風習習二官職業俱修考居稱職除批令帶
俸管事高麟游前後歷任與施恩典各任內行過事蹟
徑自造冊差人齎繳五事冊揭行令咨送部院外理合

具題伏乞勅下吏部將知縣施恩典高麟游再加考覈
酌議題覆施行爲此具本謹題請旨天啓三年八月二
十一日上奉聖旨

覆生員楊柱等招疏

題爲孽臣倚庠逋賦聚黨逼切掠財斃命異常大變懇
乞聖明亟勅拏究以明國法以維世風事據四川按察
司呈問得犯人一名楊柱年一十八歲係蜀府左護衛
人先年考入成都縣學生員狀招已故父楊崑存日襲
授本衛鎮撫官曾在蜀府管工每月額給口糧銀二兩
八錢本官領種王田十一分每年卽於田租內除扣抵
口糧并完納外尚有拖欠不等至萬曆四十八年三月
內楊崑物故將田遺與柱管業前田應有上納麥租議

將三月分口糧折白銀一兩二錢抵筭租數比不在官
管莊門正史繼泰不允本年七月初十日史繼泰差在
官軍伴唐仕登楊友爵行拘追比伊等各就不合欲行
需索方許銷筭噴柱不從遂扭本生先被承奉責發儀
衛司監禁病故義兄楊福帶見史繼泰彼時柱與伊在
官祖父楊鍾同至史繼泰處面質柱因年幼無知楊鍾
以老儒主持各不合情不相下因而史繼泰令唐仕登
等將楊福帶見在官廳頭蘭宗文亦因言語相激蘭宗
文遂報知今故馮承奉將楊福責治十五板收儀衛司

監候不意楊福於本月二十六日身死楊鍾等自合赴官理論又不合稱先逃今在官把總馬斯錫楊鏞狐假助威聳將楊福責禁率同柱與在官業師生員楊敬亦不合不以理論柱等遂同本族在官生員楊鐸楊銍楊崙卽楊岑楊崙楊試齊往承奉司索討棺木承奉避門不出各生行至夾道內各不合與楊嶠楊試詈罵承奉彼有不在官麻子內官將柱等互相拖毆攘鬧因夾道與宮門相近聲聞於內啓王速召曹母二長史并府縣三學教官方將楊敬等叫出原無搶掠并打傷宦官官

女情由比楊鍾隨赴軍門喊叫柱又不合於二十七日捏具違旨打死人命情詞告蒙督撫饒都御史批仰按察司嚴究招解比楊鐸又不合出名公呈同三學生員具闖惡殺人等詞同日呈蒙本院批仰按察司併招報府令先在官今未到不知情軍人張文遠具違旨叛變事於二十八日告蒙本院批仰按察司併究報張文遠又具逋負國課劫掠王宮情詞於二十九日投蒙本院批仰按察司併查報蒙司抄詞牌行成都府提審間又蒙周按察使查看得楊柱等所告係干庠序乃提學道

專職相應呈請合無改批該道提問招結由詳呈蒙本
院饒都御史批該司秉憲全蜀刑名自其職掌學道巡
歷較閱恐難聽理仰司查照另牌從公審究繳蒙司備
牌行府審究問比楊鍾經過在官典儀王從教門首恐
府差伊往各衙門投札又不合主謀將王從教家錫香
爐瓶值銀一兩六錢打毀原無劫毀房屋及打傷在官
宦官陶胤鶴史文福并劫駕馬情由其折毀楊鏞馬斯
錫楊瓚等家淫污劫財傳奇情節亦無憑證又蒙本院
饒都御史紙牌仰按察司即便諭令三學生員并王府

宗室內官人等知悉除兩詞狀內互告有名者俱聽承
問衙門行提秉公審究其餘無名者各循禮法不得自
干法紀如再不遵者生員行提學道內官宗室本院啓
王定將爲首者提解重究蒙司行府嚴諭靜聽處分帖
蒙華陽縣將犯人唐仕登楊友爵張文達太宇惠銀山
張矮子田老道馬狗楊國成姜二狗李元徐二宋應學
楊柱楊鐸楊敬楊銓楊試楊嶠楊岑等二十一名具由
申解本府馮知府逐一研審得生員楊柱之父楊崑管
丁王府每月得口糧二兩八錢向來租種王田三分抵

推錢糧今年三月間物故時應還麥租議將三月分口糧折白銀一兩二錢抵筭租稅而管租門正史繼泰未之許也卽差唐仕登同楊友爵拘其家屬楊福柱與祖楊鍾俱至面質抵租兩不相下隨見廳頭藺宗文亦言語相觸卽報之承奉將福責十五板收羈儀衛司蓋六月十日事至二十五日而身死柱等以福係家人遠住遂寧恐渠家告害遂衣巾控告承奉求得棺木收殮令彼家無後言也因承奉堅拒不見柱等卽出夾巷彼時言語相詈事實有之雖各生亦不能自諱適有麻子內

相未知是何姓名卽率衆打楊柱一生楊鐸等亟行往
救柱雖脫身而鐸等七生竟留之於門內矣此時此勢
羣小亂擁鐸等亦欲聲冤遂至官門未時而入戌時猶
未得出其間凌辱衣冠未得一一殫述而王命召二長
史并三學教官發出七生廼柱之祖楊鍾業已急懇於
本院矣次蚤王府亦懇本院三學諸生不勝忿忿思洩
衆恥王府又以逋負國課等事呈之院及學道宗室青
衿互相攻擊轉發本府嚴提各犯而蜀府發唐仕登楊
友爵張文遠等七人對審查友爵仕登俱是正身張文

遠乃佃戶楊應舉代解此供自應舉且稱王命不敢不
來若太字惠銀山張矮子田老道則醫生無涉者也夫
蜀王賢名動聞海宇茲慨發數犯明聽處分其虛公一
念誰不欽服唯是馬斯錫楊鏞等素行兇惡衆口噤噤
恨不食其肉而寢其皮一時尚未並發隨行縣提竟畏
避遠遁杳無蹤跡設法拘究不下十餘家如馬狗係馬
斯錫家人楊國成係楊鏞妻兄姜二狗係姜鍾秀家人
李元係李芬家人徐二係徐應元家人皆應對理人犯
親屬宋應學以金戶牽告在詞併行拘繫此蓋面審楊

柱諸人再四研鞫一一無異叅看得唐仕登楊友爵口
托催租心圖需索而拘繫斂弄實以其身爲禍始卽後
段毆辱一事雖非二犯下手若根究源本謂非二犯作
孽以釀此擾擾者乎馬斯錫楊鏞等造謀生事雖今逃
避詎能高飛遠舉不在人間今各家屬具在卽押各犯
拘獲正罪可也餘牽告如宋應學輩似應乞恩免究據
情論法大約不過耳耳第緣緊關人犯未齊似難定擬
具由解審定奪今將長史司遍解人犯及拘獲未出各
犯家屬姓名登註明白擬合解詳除遵行免拘詞牌另

繳并無干楊瓚蒲采石文仲何應講袁成周隨康應學
釋放將唐仕登等呈解本司并詳提學道又蒙周按察
使審看得楊柱一事其始之與門正史繼泰廳頭蘭宗
文相角也爲筭租故也其繼之以衣巾控告承奉也因
其責家人楊福逋租羈斃爲求棺殮故也爾時理解亦
易易耳乃柱等夾巷訕詈寔由承奉之堅拒不理而若
輩率衆洞毆遂令七生之受辱不堪一時塗地衣冠因
欲叩闈聲懇以致藩府有闖入宮門之說而三學諸生
有凌辱學校之詞此紛紜所由來矣大都此一事也在

藩王禮賢好士久洽青衿而諸生蹈矩循規素知愛鼎
祇因群小之恣橫遂致輿心之不平今藩府已發唐仕
登等七人聽訊雖其中有正犯有代解之殊然皆自王
命發出益以見其虐公之衷而篤念學校之重矣惟是
馬斯錫楊鏞等惡跡貫盈人情切齒今雖畏罪遠遁然
各有家屬就拘其能終漏於網乎若唐仕登楊友爵身
爲事始構此厲階百喙難追其咎太宇等之無涉宋應
學輩之被牽似應免究馬斯錫楊鏞等嚴提正法內官
蘭宗文史繼泰等啓王另治具由解蒙督撫饒都御史

批唐仕登等處分已明解審各服無詞仰司查照究招
詳報蒙司抄詳備牌行府遵行間比柱等嗔馬斯錫等
遠遁適貼公帖披猖未已國中傳聞有傳奇流布今審
無的據難以懸坐又蒙提學道胡副使批生員既果喫
虧正法各犯自有本院在也仰候院司詳行繳張文達
又具逋負國課等詞告蒙巡按吳御史批提學道查報
蒙道行府轉行華陽王知縣審明將唐仕登楊友爵各
問擬不應杖罪具招申詳本府馮知府覆看得唐仕登
楊友爵借索租逋重凌學校一杖猶輕戎首馬斯錫楊

鋪等嚴緝另究其楊福屍棺楊柱速行安埋而一切租稅筭明完納以全上下相成之義可也史繼泰蘭宗文另行啓王懲治將仕登等招詳司道隨蒙本司署印李參政批唐仕登等以催租橫索致禁斃一命其間豈無毆逼復從中作祟輒叢毆七生衣冠頓爲掃地僅擬一杖恐死者不瞑目生者有後言也戎首馬斯錫等未正三尺豈可逃之海濱竟不可執問乎仰府再一會同理刑官持平覆勘確招報奪馬斯錫等務在必獲正罪可也駁府覆審間蒙提學道胡副使覆查看得唐仕登楊

友爵需索蠅頭鼓弄狐假凌苦學校幾激衆憤杖有餘
辜馬斯錫楊鏞寔爲戎首難容漏網嚴緝另結張文達
雖係抱狀事不相干相應免究楊柱身列青衿道惟自
盡所有楊福屍棺速行安埋以後一切租稅依期蚤納
亦春秋之應當責備者也史繼泰蘭宗文另行啓王懲
治將唐仕登等各問擬不應事重杖罪具招轉呈巡按
薛御史批唐仕登楊友爵假租酷索學校受凌杖未盡
辜依擬贖完發落庫收繳史繼泰蘭宗文啓王懲治馬
斯錫等另緝蒙道抄招轉行間本府將前招牒蒙理刑

羅推官覆審看得生員楊柱雖負蜀府麥課寔有父糧可抵乃史繼泰不肯通融致笄家八楊福於獄則唐仕登馬斯錫追呼聳稟之爲也雖羣毆衣冠在七生難免輕身入禁之過然奔亡一命在公憤安得無鼓噪要以城狐宜褫投鼠亦似宜忌且唐仕登楊友爵求索尚未得財催租終得藉口似覺原擬法止此耳至於馬斯錫楊鏞遠遁不出亟當嚴緝但恐緝久不獲反羈係寒生誦讀合無將唐仕登楊友爵照原擬請賜允轉庶士氣有少伸之幸青衿免拖累之嗟牒蒙本府馮知府覆

查無異將唐仕登等具招覆詳本司署印李叅政看得
青衿楊柱逋負王租也原藉故父楊崑歷過之月糧可
以兌抵不謂史繼泰堅執不允而差唐仕登等扭住義
兄楊福執之承奉扑責禁斃乃梟惡馬斯錫楊鏞等聳
此厲階耳及楊柱被辱諸生受毆而凌轢衣冠之罪遂
浮於禁斃一命矣今馬斯錫等雖遁宜速緝究以儆憑
陵唐仕登楊友爵賤隸而聽頤指歷審原未索財姑依
杖懲法無枉縱除史繼泰蘭宗文啓王另治將唐仕登
等仍各照原擬具招於天啓元年閏二月內通詳隨蒙

巡按薛御史批唐仕登等先於提學道呈詳批發矣該
司查照行繳蒙司行府遵照訖彼時撫院移鎮夔門前
詳未蒙批示票行各驛查明另報間蜀王聞各生數次
告擾遂將前情具疏內稱臣祖分藩西蜀二百餘年以
來樂善循禮凡係宗室皆斤斤自守不敢踰軼尺寸至
於成都士子草昧之初落落如晨星臣祖始建寶賢堂
收育本衛俊秀而臣父端王時以堪輿家言建橋建塔
於是人文始盛科第始光至於秋試之士南宮之雋未
常不殷殷隆禮故謳歌謠頌歸美賢王其芳躅不磨而

宦遊於蜀者亦人人能言之也豈謂迨臣之身青衿轉
盛旣無水木本源之思而朱邸遭殃竟成藩國陵彝之
勢若包羞忍恥不一披露於君父之前無論臣溘先朝
露目且不瞑何以見先臣地下而壞法亂紀地方且階
之爲厲矣生員楊柱楊鍾楊鐸等係臣左護衛百戶楊
崑之子霸占臣田七十餘分自四十二年一起拖糧千石
課銀四百餘兩久催久抗六月間該臣行令承奉司拘
其家屬楊柱包藏禍心計攙積病家奴楊福搪抵量責
十板釋放去訖七月十四日福以病故臣在後官忽聞

喊聲大震人報楊生員等率領數百餘人闖入端禮內城未幾又報入承運殿且進逼內宮乘機搶掠宦官官女盡被打傷臣一時惶懼計無所出正同眷屬驚奔賴長史召同合府官員并該學教官入宮勸諭方得解散臣時以仆地絕而復蘇次日柱等又糾黨數千膚慙撫臣批行按察司招解凡隸名王府者一網打盡該司轉行成都府提解柱等招貼四門復於八月初一日煽聚鼓噪將宦官陶胤鶴史文福等毆傷垂死劫去駕馬等件隨至典儀王從教家抄劫毀房又將承奉下書役楊

鋪馬斯錫楊瓚等家并行拆毀復肆淫污席捲諸郡王
奔訴撫院羣兇把截不容官府一持正論隨卽捏造傳
奇并撫母王妃於內言之痛心扼腕蓋數百狂生旣已
要挾鄉紳則鄉紳不得不從風協應合郡士宦旣已聳
聞當道則當道不得不從衆波流斯文重而親藩輕百
足扶而孤宗僂矣獨不思生員雖非王府所轄然王臣
之子也父爲臣而子行逆此可委之不問乎楊福卽云
身故然風病之軀也况薄責非致死之刑調理有醫生
可證此當人命爲詞乎兇徒忿爭圍繞房屋者有例此

就平民而論也今且圍繞王宮反將臣府人役摭罪重罰而聚黨行兇者可置之罔究乎勢豪大戶欠秋糧五十石以上問罪監追完發附近二百石以上發邊衛充軍此大明會典所載而神宗皇帝賜勅一道內云凡官員軍民佃戶人等敢有欺凌侵越霸占久逋常賦等項輕則行撫按官拏問重則叅奏處治新綸舊例皆炳若星日也楊柱等負千餘而歷三載地方官既非職掌而又欲臣付之不聞乎今日臣不足惜如太祖高皇帝之裔親何如皇上何而遂欺蔑至是乎大抵邇來士風日

壞士習日囂而所稱彈壓者輒以安輯姑息爲上故有
結黨而詈毆地方有司者又有聚衆而焚燒宦室者每
閱邸報輒爲太息而先按臣彭端吾謂成都三學生員
或糾黨攫奪商貨或詐盜搶掠民財不異中國蠻夸兼
陝制官府則有司不敢詰問魚肉小民則佐貳惟其驅
使是所由來者已漸而不意發難於臣且不意如是之
慘也今世子妃彭氏與承奉馮應宗後先身故或以驚
惶成疾或以侮辱傷心楊柱等雖非手刃然一命寔由
柱等而死至左右近習烏驚星散臣復孑然一身幽居

憤懣命若懸絲恐長逝者魂魄私恨無窮爲此瀝血冒
懇伏乞皇上念臣孽非已作變實寒心特遣從騎扭解
來京嚴勅法司虛心問訊無謂衆口難調而遂忍紀綱
之倒置無謂孤宗素弱而遂憑臣庶之披猖但使曲直
昭彰而天潢無恙法度森嚴而地方以寧不獨臣一人
受賜其所關風尚而維持世道者非淺鮮矣若夫本府
莊田子粒上以備包茅之貢下以資懸釜之需自豪右
雄據以來視爲已物而楊柱作俑之後人將效尤久假
不歸長此安窮容臣查核清理自行召種庶罄石宗盟

長沐生成之恩而渠魁惡黨永消睥睨之奸矣等因奏奉聖旨近來士風澆惡生員每每聚黨橫行大干法紀楊柱等係王尉丁之子輒敢霸占王田通負王課却又假借人命鼓聚入官勢同倡亂甚至驚斃世子如本當扭解來京依律正法姑念干連甚衆卽著彼處撫按官嚴提奏內有名人犯根究黨同主使并捏造傳奇之人從重擬罪不得徇情偏護一應侵占田土悉行清查退出聽本府自行名種撫按官仍親詣王官安慰以清地方還寫書與王該部知道欽此欽遵抄部送司案呈到

部看得分莫重乎君臣法莫嚴於鼓噪蜀王帝胄也乃楊柱等何物么麼不思其父見爲王府之官輒敢倚恃青衿逼凌親王不惟占田逋賦抑且聚衆猖狂藐國法不啻弁髦敢於乘機劫掠視天潢猶同兒戲甚至驚斃王妃所當盡法正罪以警澆風無令漏網吞舟用昭憲典但未經地方官審明中間恐有詞浮於實者既經該司案呈前來合咨貴院煩請轉行四川巡按御史查照蜀王奏奉欽依內事理將奏內有名人犯嚴提到官審實依律究擬徑自具奏以憑議覆等因移咨備劄前按

臣薛御史備行按察司卽將奏內有名人犯嚴提到官
會同布政司提學道逐一從公審實依律究擬定限一
月以裏具招詳院以憑覆審具奏蒙司備行成都府提
審間玄字典膳所在官書辦侯大觀等又具孽臣倚庠
等詞并柱等占種田畝及逋賦數目造冊投蒙巡按薛
御史批按察司併問報冊附又蒙督撫徐都御史批仰
按察司併查報冊併發比柱又具蟻儒壘粉額天甦命
以拔沉淵以消誑誕事訴蒙薛御史批按察司併查報
又訴蒙督撫徐都御史批仰按察司併問報俱蒙抄行

成都府署印重慶府余同知查得奏內以曹母二長史并二學教官爲證移准長史司回稱先日生員楊柱等六七人始初入府不知何時後據典儀來召本司及三學教官至宮門委會生員七人於時已近三鼓矣止見宮門緊閉彼時將七生交付三學教官引去至於次日傳出世妃著驚感疾乃宮壺內事非本司所知據實回覆等情又據府學教官黃溥等回稱楊柱係成都縣學生員於四十八年六月二十五日二更時分奉蜀王令夏典儀到學喚三學教官何亞舉等同一長史隨至府

中云三學生員闖入王府緣由又據生員楊柱等喊叫
哀訴等情職等據實止有生員楊柱共七人各有衣冠
在府彼時眼同二長史領出各散次日生員同王府許
告兩院司道府已蒙詳審結斷在卷成都縣教諭何弘
策華陽縣教諭吳成德等各回稱查得生員楊柱與王
府所犯在先且職等到任在後其中緣由惟府學見任
教官得知各回報前來蒙府審提柱等一千人犯卷證
到府蒙余同知審得楊柱年方十八么麼豎儒耳假令
有賢父兄陶之決不至真行入網也細審楊鍾係伊祖

楊敬其師也當唐仕登拘楊福赴史繼泰時楊鍾同柱至彼此不相下爨所從來矣比再送蘭宗文又報馮承奉將福責十五板收監雖各官不念學校體面亦楊鍾不誨柱以進止之義也楊福以欠糧斃命律無應抵應理之文奈何率子弟七生往承奉司求棺承奉避而不出宜也輒詈罵內官於夾道中其被麻內官拖毆皆自取侮耳又何尤焉乃連次告擾院道以人命毆儒爲詞嘵嘵不休宜蜀國有此請也叅看得楊鍾等始以兌糧起爨者內官也繼以楊福死求棺不遂詈罵者亦內官

也堂堂親藩豈敢輕犯惟是夾道去官不遠投鼠不審
忌器責以擅入喧譁其罪何辭比見王於端禮門七生
叩首謝罪旋呼教官發出上下分誼兩全可以已矣胡
爲旣出而打毀王從教爐瓶雖屬小物而釀禍由此楊
鍾爲首猖狂應徒革楊柱欠糧生端楊鐸出名公呈均
杖降青楊敬楊銓楊岑楊嶠楊試各納米法如此盡矣
其餘搶掠駕馬傳奇驚死等項事涉風聞未有的證未
經拏獲難以苛求一切田土遵旨退還另佃其所欠見
年租應追據楊柱等各執管和官收帖須抄單送府查

明以便追補當此皇恩浩蕩之時加以賢王仁恕之度及於寬政所全多矣唐仕登楊友爵各照原擬馬斯錫等免究具招連人解詳本司覆審間又蒙提學道胡副使看得楊柱論學校則朝廷作養之子弟也論臣屬則藩府世蓄之遺隸也培植固所當加分誼亦宜自盡而負租不完已失終事之義僕死小隙敢冒齒馬之嫌雖與內侍爲難實逼宮闈之近以致橫遭凌毆徒令通學之短氣觸犯王奏遂煩嚴旨之切責據該府詳審傳奇搶掠等情雖無確證而身爲臣庶驚觸王尊一夫冒犯

禍及百口闔族人人追田孰是啓霽一姓家家巷哭誰
爲株連此其觸尊犯上固三尺之所不容貫而敗羣之
莠所傷寔多亦通學通族之所飲恨而切齒者也合無
將楊柱黜革爲民盡奪其田仍與楊鍾楊鐸各照府擬
分別徒杖黜降節年逋負勒限追納以示大創之警以
正名分之尊以見惟正之供萬不容拖延至於楊敬楊
銓楊岑楊嶠楊試五生或以尊長黨謀或以卑幼隨行
雖槩犯擅入之條亦不無參差之情除各行學戒飭外
或量免一二納米以稍示賢王寬憐之意若楊姓一族

原果未經欠租及擅入觸犯者仍乞分別有無辜狀給
還其田以見賢王貳而執之服而舍之刑莫威焉德莫
厚焉唐仕登楊友爵需索首禍或於原擬之外量示責
治以昭示賢王宮中府中俱爲一體原無偏護廝卒而
苛求青衿之意當此賓興濟濟之時益頌賢王虛公平
明之化此在當事者苦心大力委曲納牖非本道所敢
盡議也移關前來又蒙本司林按察使會同周右布政
使提學道胡副使審得楊柱列在青衿係府校楊崑之
子世食藩祿則固王府之臣隸也原本自出凜然冠履

之嚴迺負租不還急公之誼謂何伊僕楊福以欠租被責後因病死此一常事迺柱旣以索棺啓爭彼以被辱發難聽楊鍾同楊鐸等七生喧鬧致徹乎宮門王召長史及教官領出鍾柱仍打毀典儀王從教爐瓶等器且三學呈懇之官賢于體念學校發出唐仕登等七人司府審詳懲責是亦不可以已乎迺柱駕言人命且以馬斯錫等招提未到遞貼公帖披猖未已甚至國中有傳奇之說流言傳布王其何能堪此萬里叩關豈其得已今審傳奇無有實跡出自誰手難以懸坐卽搶掠驚死

亦未有的證但此楊柱者官門之喧聲甫歇國中之囂
評復騰身爲王臣釀茲禍始夫亦至犯上至無等矣欽
奉明旨之森嚴卽禡其衣冠沒其田土仍編之城且孽
伊自作人乎何尤楊鍾其祖楊鐸其師也父兄之教不
先子弟之率不謹階之爲禍罪復何辭應如府議分別
徒杖黜降以警澆風而正名分至楊敬楊銓楊岑楊嶠
楊試等均犯擅入之條旣行學戒飭而輕重分之楊敬
楊銓楊岑以黨謀各杖楊嶠楊試以隨行姑免法非縱
也若楊族田產雖係王田但其上首各有承買相沿已

久無論貲本難捐且或有祖父纍纍之塚在焉其耕之則民之世業也其輸之則王之府實也有田必有佃府中固不能自耕而食之有佃必有租惟其無敢逋負輸納完額足以供給府中貢饗而已賢王豈有利焉而必盡退其田乎除楊柱楊鍾楊鐸首禍之人田應退還別佃外其餘諸家遵旨聽王府長史司會同府縣官清查果係頑負應卽退還如歲無逋租免其退佃仍諸家管種逾年照數完輸以後倘有奸頑卽聞官嚴爲懲追用示賢王寬恤之仁以免小民啼號之苦此固朝廷雷霆

中兩露賢王禮士愛民夙有令聞諒亦不難加惠茲土
以永譽長世者也至唐仕登楊友爵需索啟彙亦應杖
警外量加賁治示懲將柱等轉呈罪犯外結得每銀一
兩值鈔八十貫招結是實七名楊鍾年六十五歲楊敬
楊鐸各四十歲楊銍楊岑各三十五歲係生員唐仕登
二十六歲楊友爵三十歲係軍伴各招同二十員名陶
應鶴史文福蘭宗文年各四十歲係內官楊鏞馬斯錫
楊瓚各四十五歲李芬徐應元各四十歲係把總王從
教四十歲係典儀侯大觀周英各三十八歲沈朝忠吳

應時各三十五歲周之冕席朝用各三十歲係書辦楊
嶠楊峩楊鉞各三十歲楊順二十五歲楊試二十歲俱
生員各供同議得楊柱等所犯楊柱楊鍾各除輕罪不
坐外楊柱合依誣告人死罪未決者律楊鍾依棄毀人
器物者計贓准竊盜論一百二十貫罪止律與楊柱各
杖一百流三千里楊鐸楊敬楊銍楊岑唐仕登楊友爵
俱依不應得爲而爲之事理重者律各杖八十俱有大
誥及遇蒙欽恤事例通減二等楊柱楊鍾各杖九十徒
二年半楊鐸等各杖六十俱生員審楊柱楊鍾唐仕登

楊友爵俱有力候題允至日各照例楊柱楊鍾楊鐸楊敬楊銓楊岑唐仕登楊友爵各納米價完日楊柱楊鍾行學革退衣巾楊鐸行學降青楊敬楊銓楊岑楊嶠楊試仍發學戒飭肄業供明陶應鶴等各寧家照出陶應鶴等免紙楊柱楊鍾楊鐸楊敬楊銓楊岑楊嶠楊試官紙銀各二錢唐仕登楊友爵民紙銀各一錢又贖罪銀楊柱楊鍾各一十五兩楊鐸楊敬楊銓楊岑唐仕登楊友爵各三兩俱追貯成都府官庫類解楊柱楊鍾楊鐸原領蜀府田地各照數盡行退還另招佃種見年租穀

照數行追其餘俟清查明如有頑負者退還若歲無
逋租免其退佃仍照舊管種完輸又於楊鍾名下追銀
一兩六錢給王從教收領以償打毀爐瓶之價具招通
詳蒙督撫朱都御史批楊柱以細故發難犯分越規黜
革問徒已足平賢王之憤矣若楊族佃田承種已爲世
業苟無逋租何必追出罪厥渠魁勿令株蔓王亦大有
間焉仰候會題行繳又蒙巡按薛御史批楊柱逋租始
禍楊鍾楊鐸等羣附黨謀倚青衿而犯王章罪其何道
各依擬分別徒杖黜降發落候新院會題行繳俱經行

司轉行成都府遵照間比先不在官生員楊峙不合垂涎前田仍霸種不還楊鐸又具憐寬豁宥情詞於天啟二年二月十六日訴赴督撫朱都御史批仰按察司查報蒙司抄詞備牌行府審報去後隨據長史司敬奉蜀王令旨內云楊柱楊峙等違斷復占王田具詳呈蒙巡按張御史批楊柱一事該司呈詳前院以交代行矣尚未題復本院政不敢草草具奏今藩府又有此一畚移詳查原招亦有清查頑負應卽退還如無逋租免其退佃之請此日不清更俟何日將毋留爲奏辯竇于按察

司會同布政司查照原題情節覆審招報蒙司行府具
招解司間王府查楊柱等自元年奉勅插明田土起至
二年止逋租竟不完納著承奉司開造逋負錢糧書冊
內造楊柱名下未完卯銀三十五兩三錢零一釐清油
一百七十七斤稻穀三石九斗小麥五石三斗二升五
合黃豆二石六斗五升菜子一石四斗七升楊鐸名下
未完卯差銀五十九兩三錢六分五釐清油九百六十
八斤稻穀八十八石三斗八升酒穀四十九石二斗六
升小麥三十三石二斗七升黃豆三石菜子二石零六

升楊敬名下未完卯銀二十七兩零四分五釐清油五
百九十八斤半稻穀一百二十八石四斗七升五合酒
穀十三石小麥十四石零五升菜子一石楊銓名下未
完卯銀三十九兩零七分清油一千二百九十四斤稻
穀十二石八斗九升五合小麥二十九石六斗三升楊
崙名下未完卯銀十六兩二錢七分清油二百七十五
斤稻穀十石一斗八升酒米十六石二斗五升小麥五
十三石一斗五升楊峩名下未完卯銀十六兩九錢四
分五釐清油三百五十六斤稻穀七石四斗九升黃豆

十二石二斗五升小麥十九石三斗六升菜子一石七
斗四升五合楊順名下未完卯銀七兩五錢一分清油
三百一十八斤稻穀十二石五斗三升小麥十石三斗
七升楊鉞名下未完卯銀十三兩四錢四分稻穀二百
二十一石八斗二升黃豆三石菜子二石七斗七升五
合小麥十石九斗一升楊嶠名下未完卯銀十八兩九
錢三分楊試名下未完銀一兩零八分菜子八斗自萬
曆四十六年起至泰昌元年止共欠前數遠年姑從寬
政及天啟元年本府奉勅到日插明招種徵收捧睿札

同書冊齎投巡按張御史蒙行憲牌接得藩王睿札開
送楊柱逋負錢糧書冊一本到院展閱冊內逋欠者有
名未完者有數則一鞠便有歸著矣併發本司抄冊仰
府官吏查照牌內并書冊事理速查楊柱等逋負錢糧
務要逐審明確具招解司會審轉呈楊順楊試等又具
霸產殺命情詞訴赴巡按張御史批按察司會同布政
司併查報楊敬劉氏等又具奪產殺命情詞訴赴巡按
張御史批事經題請按察司會同布政司從實勘報蒙
司抄詞仰府官吏查照抄牌詳詞內事理即將有名入

犯行提到官逐一研審明確解司會審轉呈隨准長史
司牒呈內稱蜀王令旨開稱楊柱楊峙復占王田緣由
恁司裏可將予此情詳悉具文達之督學道希惟上遵
聖意之隆下體予辱之甚令予心安方得無言等因牒
由到道蒙牌行府拘審間蒙本司紙牌蒙本院憲牌轉
行本府會同叙州府理刑廳將生員楊峙等佃種王田
逋負錢糧一起犯證通拘到官查照原行情節逐一會
審明確依律議擬具招限三日內解司覆審轉呈隨該
本府署印管糧胡通判會同叙州府理刑宋推官會審

得楊姓各生占種王田多寡不等應盡退還府另招佃
種楊峙原未入官祇因違斷復行占種王田楊柱等逋
負錢糧不行完納各情俱的叅看得楊柱與楊鍾楊鐸
楊敬楊銍楊岑楊嶠楊試等雖列青衿然皆左護衛之
子若孫也主僕之名分儼然又非尋常百姓之比領種
王田而負其租何怪管莊者之急於追徵乎差唐仕登
楊支爵拘柱之義兄楊福責十五板而羈候之法自應
耳寧有過當十五板豈便能死人福之死蓋死於病也
柱乃恃倚學校糾同楊鍾楊鐸等七人往索棺木喚承

奉之不出復喧詈於王宮王亟召二長史三學教官領
出時各生之衣冠如故固無搶掠之情亦無被辱之狀
假令次日詣官庭謝罪認輸逋租豈不可以釋忿而銷
戮詎楊鍾隨以人命喊告而楊鐸又出名同三學諸生
具呈凌辱仍肆其怙然將典儀王從教爐瓶打毀且遍
貼公帖致訛言流布有傳奇之說是明與王爲難也名
分倒置幾犯無將王是用痛心疾首具疏叩關今旣奉
有嚴旨三尺具在誰敢姑息假借除傳奇驚斃外柱爲
禍首應黜革擬徒如律楊鍾楊鐸楊敬等七人已經屢

鞠分別革降杖戒無容再議楊峙查未入宮不在七人之內止在外扶同鼓噪意欲占種並擬杖戒惟是田王田也子奪當由於王隸臣佃丁何敢執爲已業而占踞不退據發下逋負數簿逐一研審楊柱楊鐸等各名下俱歷年積欠卯差銀各若干清油穀米豆各若干是應勒限照數追比仍着令退田聽另招種其田中或有墳塚姑免填平以昭王法外之仁將楊峙具招解司該本司署印吳副使會同林左布政使分守川西道戴叅政覆審看得楊柱等世隸王尉種王田其受藩府叅養

之恩亦既渥矣此日之衣冠楚楚家業隆隆木本水源
皆可深長思者既獲其利又逋其租卽庶民有力之家
亦所難忍攝其家人楊福薄責十五板監禁追租原非
分外苛求柱等迺因楊福病死不勝一朝之忿初與承
奉爲難喧聲直徹宮闈繼糾通學與詞謗帖遍貼城市
誰爲禍始而披猖迺至此乎惟是傳奇原無指實驚薨
世妃亦難懸坐楊柱等原疏有名七生擬城旦褫衣巾
者二降青者一戒飭加杖者五田已插還明旨煌煌誰
其敢悖法如是止矣楊峙原非負租之人不在鼓噪之

內王已置之度外本生復躡入事中總是雞肋難忘餽
鼎念切情固可原罪亦自取此項田土乃欽賜親藩膳
養之產錢糧不經有司予奪不由官府楊族之田自七
生而外收之固王之分也予之實王之恩也有田必有
佃有佃必有租後之投佃者未必皆孝子順孫今之悔
禍者未必不感恩圖報但租完則情有可原或可仍歸
於原佃租負則法在不宥卽應盡歸之府中尉固王之
家臣田與租乃王之家事總聽賢王之自裁而已楊柱
等俱照原擬楊峙加杖以爲多事之戒將峙轉呈罪犯

一名楊峙年一十五歲議得楊峙所犯合依不應得爲而爲之事理重者律杖八十有大誥減等杖七十係生員併候題允至日照例折納米價贖罪完日發學戒飭肄業等因招詳到臣該前撫臣徐可求按臣薛來衍欽遵明旨親詣王宮問慰訖今據前因該臣會同巡按四川監察御史張論看得生員楊柱係藩王紂丁之子名分素嚴源本當念乃逋額租而不償假人命以生事始則喧呼直達於宮庭繼復糾衆遍貼夫謗詞甚至打毀典儀器物披猖太甚法不可縱楊柱楊鍾黜革允符其

辜楊鐸父教不先與楊敬等占種釀釁均應杖懲奏內
驚故世子妃及捨駕馬造傳奇等項節經多官鞫明審
無證據難以深求至於楊氏一族所佃之田除首禍諸
生退出別佃外其餘亦多守法未嘗逋者况先人之塚
墓纍纍在上法以懲頑而恩以逮下在賢王豈有成心
焉人皆衛丁田皆王產旣奉有明旨總聽王之自爲加
惠耳理合具題伏乞勅下該部再加查議覆請行巡按
御史衙門遵照發落施行爲此具本謹題請旨天啓三
年八月二十一日上奉聖旨該部知道

塘報各路功次疏

題爲塘報功次事據監紀副使李仙品僉事劉可訓知府鄭朝棟總兵李維新塘報自天啓三年七月初一日起至八月二十九日止陸續據將官劉養鯤報稱奉令揀差將官鄒世賢唐二等選敢死士數十名暗渡何家河七月十七日到龍場壩時正三更將崇明父子巢穴上下兩街舊衙趁風放火盡行焚燬燒死男婦不知其數哭聲震地以致二酋棲止無定又據偵兵探得老酋劉姚家坪小酋劉石炭坡各統兵三營該鎮隨卽督

發叅將林兆鼎范繼道張邦絃劉養鯤鄧懋官劉宗良
夏永通鄧玠等各領兵至楠木坪刁菱溝二等囤白水
尾等處與賊大戰斬獲偽都司黃么兒及賊目王繼先
宋堯等三十六顆苗級四百五十七顆生擒偽都司陳
清等四名俘獲男婦三十四名口槍刀弩絮四十五件
馬六匹招降思栗坪苦菜壩苗目蘇保王應虎侯應權
羅承德等二十六名俱係陣前投降送家口赴永寧情
願立功降苗二十五房又據遵義路監紀僉事趙邦清
同知商良弼塘報陸續准副將秦衍祚加銜叅將陳一

龍侯良柱加銜守備李棟將官羅安良等各率兵攻打
茶崗橫山箐燕耳岡等處斬獲奢寅伯父奢阿東蠟九
父子三人大頭目四名苗級三百八十四顆生擒偽總
兵王朝臣蠻苗七十九名口招降高寨大頭目王廷彭
家營頭目趙汝安及苗民四千餘名口陣前奪獲槍刀
弩銃五件牛馬六十一匹隻奢崇德巢內投送出貴州
乙卯科中第四名舉人湯師辛本道委差綏陽縣生員
郭三聘招出西日游朝炳鄭一顯游朝坤楊明輝等攜
家口四百餘名口於七月二十七日至桐梓投降本道

動支餉銀大加獎賞鼓舞令其立功蘭目趙國璧於八月初五日過江投降被扶國禎知覺同偽副將周之富統兵趕至青岡坪趙國璽斬周之富加銜遊擊雷震乾等部斬十四顆又據綏陽路監紀叅政吳國仕塘報據監紀原任綏陽縣知縣任寵報准陳叅將移報分發加銜都司傅元勳傅天鎮報稱攻打白蕩毛臺等處斬獲黑苗真正大頭目阿狎李狗兒苗級二十一顆又於杜包等處招降偽守備李廷相蒙瓊苗衆五十餘房各等因陸續塘報到臣先是掃穴之後因糧糗不繼洪水大

疫竝作臣暫令各將分守隘渡檄行白撒普市畢節被
害之民及招賊親信頭目諭以免死協力擒酋嚴行各
將如遇賊警併力擒殺去後今據前因該臣看得逆賊
父子挺而走險藉庇水西復聚殘苗出沒今藺目趙國
壁西日游朝炳等業已投降酋勢漸殲臣病委頓發令
懸賞督發總兵李維新移住古藺催兵逼進只俟銀米
稍奏即便過河擒賊所據各路擒斬招降功次理合塘
報伏乞勅下兵部案候事寧一體敘錄施行爲此具本
謹題請旨天啓三年九月初二日上奉聖旨兵部知道

優卹併補道臣疏

題爲道臣盡瘁殞軀乞賜優卹以慰忠魂併議就近陞
補以安地方事據遵義府知府胡悅安申稱監紀遵義
今陞分守川北道叅議趙邦清自遵義染病移出桐梓
調理不愈於天啓三年八月初五日病故等因報臣該
臣看得遵義道僉事今陞守北道叅議趙邦清貫日凌
霜之節轟雷掣電之材入蜀以來慨然以討賊爲任一
到綦江卽斬僞總兵袁衣繡又督侯良柱陳一龍進兵
斬渠魁石良三父子因而人心震懾漸就招降初營松

坎繼管桐梓凡被脇舊民如安蠻羅安良趙國璽等攜
家而至共六萬餘人近又發兵搗蘭招徠西目新疆諸
務漸有條理厥功不爲細矣不意六月初九日親入郡
城觸染腥瘴一病沉痾昇出桐梓藥餌不到惟日飲冷
水數十碗延至八月初五日亥時竟以不起固本官之
不幸實蜀之不幸也查得大明會典欸開在外文武官
員不拘品級其以死勤事者卹典取自上裁又一欸開
查有軍旅身殲助勞懋著者卹典自宜加厚等因若本
官家食已一十五年旣投夜郎魑魅之區復當玄黃血

戰之苦擔簋席草曾無片晷之寧居戮叛招攜已建無
前之偉績冒炎觸瘴齎志以歿功本當錄死實堪憐遺
下守北道員缺查得監軍僉事劉可訓忠節千尋壁立
雄才萬壑泉流成都圍解與叙南恢復之功俱經督按
二臣題叙明白原在優渥之列厥後力拒強寇取永搗
蘭勤勞幹濟真不知有其身者建績寔多循資應轉合
無以本官就近加陞叅議填補守北道缺仍料理永寧
軍務事寧之日任事理合一併具題伏乞勅下吏兵二
部再加覆議上請將叅議趙邦清查例從優褒卹用示

幽貞僉事劉可訓加陞叅議職銜填補守北員缺軍務
事寧任事庶忠魂知感而勞臣益用奮勵矣爲此具本
謹題請旨天啓三年九月初二日上奉聖旨

就近陞調府縣疏

題爲危邊殘邑酌議就近陞調以便責成事遵義古夜
郎地原多瘴癘三陷三復之後士民遠徙無人敢往業
經吏部覆用同知冉峯改補臣已促之到任聞前督臣
張我續疏叅復回原籍新任通判張盛治尚未赴任推
官一缺自馮鳳雛遇害後尚未選補今當戎馬交馳鴻
鴈哀鳴之日全無府佐任事甚苦掣肘成都府茂州當
松邊孔道生熟番苗時時跳梁地方雖云不毛而關係
極爲重大已經推有知州李有譽向未赴任近報在原

籍江西物故隆昌縣係川東衝邑被賊殘破城垣未補
瘡痍未復一應撫綏及夫馬錢糧等事全在令得其人
知縣黃榜忽以督運病故以上員缺俱係要緊地方人
所畏避相應酌議人地相宜拔材使過藉以振救一方
關係匪細查得原任江安縣知縣陳達道雖被賊攻陷
縣治顧沿江諸邑獨江安與賊比鄰切近百姓悉爲賊
用滿城虛無一人勢不能守本官獨不遠避退居隔江
蕭寺乘間截殺計擒斬千有餘級及查臣自成都圍解
之時具恭報逆賊前後情形疏內開報本官陸續斬獲

新繁僞知縣李之偉僞都司李梧李梅生擒僞知府李
自新招降頭目阿興等五百餘人斬僞總兵陳祈搽獲
錫印木印二顆又拏獲姚應台等功寔浮於其罪至天
啓二年四月內逆賊復來占據是時士民未集實止空
城臣會按臣責成本官立功贖罪一面疏聞而達道奮
志身先不避矢石遂復縣城斬僞知縣白元柱等多功
又與弟酋相持四閱月今雖革任聽勘而新補者杳然
無耗收集瘡痍百般拮据士民甚德之似當開其一面
改陞遵義府推官填馮鳳雛員缺又查得筠連縣知縣

岑昌運當逆賊披猖之會處千難萬窘之地糾集鄉勇
徵運錢糧撫集流散之民詹萃吉等三千八百餘家招
出投苗百姓八百餘名給票復業見經督按二臣叙核
本官歷俸幾及四年若論邊俸事例允宜陞轉應合就
近陞茂州知州填補李有譽員缺又據分守下川南道
呈據叙州府申據南溪知縣李聯魁原任雲南安寧州
訓導候憑不至具呈該省布政司討有執照前來到任
四箇月徵輸緝理稍稍就緒忽聞部推新官王之朝踵
至本官推陞在先題改在後間關萬里來路之筋力已

窮耽延兩年彼地之更改難料進退狼狽實爲可憫今
照隆昌縣知縣黃榜近故請乞題補俾已試之吏不徒
役役風塵卽殘邑亦可甦生等因呈詳到臣該臣看得
知縣李聯魁歷任已經數月士民方有歸依若再候憑
人滇爲期甚遠恐滇中未必不另議銓補相應就近改
補隆昌員缺該臣原奉有就近更置留任之旨謹會同
巡按四川監察御史溫臯謨合詞上請伏乞勅下吏部
再加查議覆請將江安縣知縣陳達道陞遵義府推官
填馮鳳雛員缺鈞連縣知縣岑昌運陞茂州知州填李

有譽員缺南溪縣知縣李聯魁改補隆昌縣知縣填黃
榜員缺查黃榜臣已咨部報缺若銓補有人卽請改補
筠連其同知冉峯候憑到仍催復任庶殘邊廢弛之地
不致久缺而拔材使過可彰激勸矣爲此具本謹題請
旨天啓三年九月初二日上奉聖旨吏部知道

塘報功次情形疏

題爲塘報功次事據監紀副使李仙品僉事劉可訓知府鄭朝棟總兵李維新塘報自天啓三年九月初一日起至十月十五日止陸續據叅將范繼道林兆鼎張邦紘將官鄧懋官劉養鯤胡明臣張學周等報稱奉令督兵至沙木箐高家庄水落崖蕭家坳等處各大戰共斬功一百三十八顆生擒苗目一名苗羿七十七名招降阿大阿苗易脚等各送家口至永爲質立功男婦一千二百七十三名口殺手四百名陣前奪獲牛馬九十一

隻匹槍刀弩器三十四件李總兵於九月十二日親統
大兵至下河口鄆家渡劄營前鋒擒獲奸細冬狗等三
名供報水西兵十營在銀盤山劄來援奢寅本鎮使降
苗傳令過河秘諭酋之心腹羿目閻巴等二十名投降
送子爲質約爲內應又稱寅賊在司紀養鬼崖生瘡養
病十六日至築豆寨與符國禎對敵總鎮親安大砲隔
河打死苗兵無數箭銃傷者不計二十七日侯良柱前
鋒王正相與本鎮合營僉事盧安世統兵亦到鄆家渡
忽報水西助兵三十營至大坡頂至龍場救崇明父子

本鎮將辦備浮橋降苗等項俱交盧僉事調度守禦二十九日李總兵移營馬鈴河口連珠劄管曉夜設塘以防暗渡又報二酋見西兵到龍場欲乘勢暗渡水潦攻打永寧分頭大戰等情到鎮飛報各將如賊過河必合力擒捉合先塘報等因又據仁合路監紀叅政王世仁僉事盧安世推官蔣化龍陸續報據叅將羅乾象秦衍祚將官張奏凱冉達龍王正相等奉令領兵至苟村毛坡老虎寨圓木溝漩坑洞十面村洗苗溝等洞寨擒獲奸細李三陽等三名婦女二口斬僞都司神保苗功十

二顆招降男婦二千七百九十九名口苗民人戶四百六十六房得獲牛角甲一籠紬襖絮被二件刀三把槍九枝弩箭三副馬十三匹盧僉事於二十七日直衝鄢家渡李總兵自大河口以上三十五里直抵赤水連營設備盧僉事自鄢家渡以下三十五里聯落安營防禦等因又據監紀遵義路叅政閔夢得分理安羅路同知商良弼真綏路推官李必達陸續報據叅將陳一龍遊擊侯良柱命書駱麟將官楊通霑王尚明守備李棟朱天祚度朝榮等塘報卽令督兵侯良柱一路至任包三

漲水九倉立崖小寨後山等洞寨大戰斬僞都督阿果
陳四僞叅將蘇八抹賽阿倫劉茂等苗功四百四十三
顆跌崖死者無數招降奢宏下頭目張乾父子四名苗
目阿蕩等四十名苗民方相八千餘名口苗民男婦鄭
可發等陸百餘名口生擒符國禎弟符國臣蔡金貴等
蔡金美得獲槍刀器械一百二十八件馬二十二匹招
降水西目把趙永鎮等十七名男婦三千餘名口加銜
副將趙文進招降水西老木孔大頭目聶江清小水崖
脚寨頭目王日景李友信等石洞山頭目魯萬朝係魯

仲賢親叔同何金榮游朝信等携家男婦一千餘名口
陳叅將督兵至黑水金刀坑遇水西僞經歷常罵色擁
兵大戰斬僞將一名賊級一百九顆生擒苗賊羅受一
名又督同將官都正極等會合黔師向方二監軍令龍
副總都司王達李之信各分兵至兩河口與西賊大戰
斬功一百一十八顆生擒一名器械一百八十八件九
月二十四日西賊馬兵九十七騎突至遵義府城外哨
探天曉不便窮追二十九日西兵萬餘衝至周水橋來
攻川黔之兵陳一龍楊通霑秦明屏等三面夾攻斬功

不計其數賊復大敗退走西界僞將周器墨阿烏迷等
又劄三十餘營於朝陽寺等處聲言四出合先飛報又
據監紀李副使劉僉事報據將官劉養鯤部下兵冉明
貴報稱本月十一日未時分劉養鯤朱一龍王懋官傅
吉王弘化等領兵奉總鎮令發往白石崖入巢擒賊前
哨兵五百至彼忽遇賊馬兵突出截殺一陣獲馬二匹
斬功一顆後賊包崖重圍官兵抵敵不住將官各據險
奔潰同時又據傅吉王弘化王懋官俱至永城日報水
藺之賊於白石崖清水舖等處劄十二營摩尼新添堡

各劄多營等情又據遵義路閔叅政報據加銜守備蘇
廸降將鄭益顯稟報十月二十九日西賊敗回彼水西
有文來趕道及永寧路二總兵劄於策豆寨撤營前去
救援又報綦江縣發馱贏糧夫至尖山子魚岔河被賊
兵三路擁出殺傷糧夫兵士圍截馱騾四十六隻米二
十餘挑站馬二匹各等因塘報到臣爲照水蘭狡合一
面衝突遵義一面助援蘭賊而二逆欲借勢再出臣檄
令叅將陳一龍及楊通霽等督兵合黔師以拒西賊檄
總鎮行各路找搭浮橋拒河一帶招降賊黨以孤酋勢

相機擒拏以完事局去後據報前因該臣看得二逆之
腹心漸潰蜀局已將告竣無柰西賊復以七十營同奢
氏父子窺犯永蘭爲勢甚狡今且由險徑透入白石清
水摩尼圍截我兵是蜀局未竣而黔局繼至蜀之剿蘭
敵西爲計亦苦矣除馬上移文黔省及檄行道鎮及各
路將領嚴加分布相機戰守擒酋外所有斬獲招降功
次苗情理合塘報伏乞勅下兵部案候事寧一體查敘
施行爲此具本謹題請旨天啓三年十月十六日上奉
聖旨兵部知道

地方水旱災異疏

題爲地方災異事據四川布政使司呈奉臣批據眉州申報天啓三年五月以來一向連陰自六月十七八九一連三晝夜大雨如注時刻不停至二十日夜半平地水湧丈餘城內城外蕩爲銀海洪濤激射漂流通州居民二百餘家又滄死男子馮有禮女人黃氏等七十四名口東門城外望江樓一座樓下橋梁盡被推倒漂散裝餉船二十餘隻人船不知下落傾倒城垣三百餘丈勢危將倒者不計其處通州田地豆粟未收禾苗新插

者被水過處盡數漂流等因又據彭山縣申稱本年六月十八日戌時河水驟漲湧入縣城淪至縣堂東門水深丈餘四街舟行武陽街教場龍門橋各處住民水淪過簷基址房屋軍民財產民命牲畜盡行漂溺本縣登高一望苦不忍聞又據新津縣申稱六月十八日大雨如傾河水泛漲平地水湧丈餘冲破城牆五百餘丈四門城樓察院中司縣堂衙舍監倉文卷儒學殿廡牆壁俱行冲塌城內城外民房晏有梅周維翰等冲毀數百餘家淪死民婦閭應元王氏等百十餘口差馬三十餘

匹災傷迥別平時等因又據郟縣申據通縣里排鄉民彭學古等連名訴稱郟民厄值奢酋燒劫極苦無聊方復種田雨水不調已過其時入夏以來霪雨連綿水漲淹沒秧苗蝗蟲蜂起損折太多城垣民居倒塌大半時疫相傳捷近水澇冲損田地四百餘丈又據金堂縣申據本縣崇德等鄉民吳國亨等訴稱居住地名九龍潭於六月二十八日寅時忽然天雨山場地裂本戶一十七家陷入地下田地種成粟豆穀稻綿花盡被水冲掃去無存又據鶴鳴上元等鄉生員吏民吳桂芳李正秀

等各訴稱本年六月七月日期不等河伯爲災冲去田土千百餘丈禾苗盡掃國稅無靠該本縣隨同典史郭文卿分頭踏勘但見陸地成河茫然無際蕩裂漂散者盡成荒涼之地偃仆而蛀爛者盡寄生之禾紛紛哀訴不可殫述又據溫江新繁二縣各申稱六七兩月連值大雨平地水深數尺各將城垣樓臺橋梁等項捲掃冲塌粟豆禾苗各冲成漕淤歷大半各等因又據巴縣申據兩學生員錢嗣起劉光裕等呈稱入春多時雨或者造化之不平秋夏肆烈風意者天意之絕此類禱雨而

天不應豈其瘼此下民及雨而苗已枯不謂懼此凶禍
八十里赤子不望生而但求速死之爲安等情又據本
縣梓童等八十里民牟一周等訴稱入夏以來上天不
雨溪澗斷流五禾枯稿耕牛熱死喫水難尋箇箇輕生
聲聲願死七月初五日未時天降雪彈雪水龍梳倒坐
等處陡降極大天雨溝渠溢滿烈風摧樹竹木翻根禾
稼假仆泥沙顛連之狀趁今未亡之時懇恩備達上司
免致窮民逃竄等情又據嘉定州申稱六月十八日偶
值異常猛雨連綿幾晝夜兩江水壅合並橫行從女墻

逆流入城城墻冲倒五十三丈竹溪大橋一座沒溺人
口及房屋禾苗田地冲洗無筭復於本月二十七日雷
雨暴作水勢倍前冲倒城墻共四十五丈來薰門城樓
及小板橋推倒會城門城樓擊壞禾苗人畜漂渰殆盡
該知州李一鳳看得嘉定衝要之區而時多故立秋未
及一月水災三見江邊結廬之家隨流漂沒水田陸地
將成之稼半淤泥沙岸旁深谷人民率成魚鼈觸目傷
心亟情難隱又據長壽縣申爲懇憐旱苦等事據本縣
二十七里小民方本通鄉約包興文生員鄧之震呈訴

舊前歲酋變渝城漢土援兵四出沿鄉慘劫家戶一空
稱歲旱傷食草聊生強耕數畝指望秋成天心下厭雨
澤愆期自五月終旬以來六十餘天何堪薰蒸杲日全
無一滴之施稻田遍野盡成龜坼高者根葉成灰低者
含苞皆批早穀蟲傷遲無粒望束手待斃面面慘慄恐
成嘯聚叵測可虞懇乞轉達少寬力役之征便是生全
之澤又據武隆縣申爲天時亢旱事據本縣排年里甲
黃甲士等訴稱本縣俱係山澗連年天旱無收苦不可
言自六月廿四日起亢陽如火田禾枯槁人心慌亂東

手悲號該知縣劉近顏看得山邑士民徬徨之狀菜色
極艱除早職每早步行各廟祈禱外應合詳報又據蕪
江縣申據生員里排鄉民王可禮等訴稱自五月迄今
六十餘日早稻吐穗盡焦遲禾方秀悉成枯碎伏乞親
驗請蠲民無逃竄之虞等情該知縣鄒昌魯看得本縣
自夏及今風狂日熾時疫交侵隨行禁屠齋沐行香祈
禱並無感應係干地方災屯理合申報又據叙州府申
稱六月十九日夜陡被猛水泛漲將城外江側民舍及
大覺寺殿閣佛像盡行冲倒隨蒙宣化巡檢司申稱本

年五月以來天久霪雨二麥朽爛民皆枵腹六月十九日江水泛濫巨浪滔天月波菜壩太公濠大塔小塔等處房屋寺宇盡冲出禾淤沒老幼泮死數十餘人遍野悲號兵火之後又見水災冒乞申達不致逃竄等因到府合行轉報據此又據青神縣申據五門隊長黨甲吳廷蛟等報稱六月十九日天未明時江水泛漲一時湧洶異常四門城牆冲塌城外居民呼喊悲號房屋百十餘家盡行冲括男婦漂溺莫紀縣前水湧一丈四野田地粟豆穀稗等項盡是沙漫土壓卑職卽時遍閱高阜

處禾苗冲没低下處泥土掩壓一片水光人畜業產盡
去無蹤哭聲遍野情實可憐城垣公署墻壁無處不圯
緣係殊常災異合行申報各等因陸續申詳到司該本
司左布政使林宰看得蜀中連歲兵荒征輸煩苦恃在
時和歲稔大蘇溝瘠之餘無柰天不悔禍雨暘弗若自
夏以來雷雨纏綿眉州彭山叙府嘉定等府州縣治在
沿河城郭冲倒城樓橋梁公署推塌無存廬舍牛畜田
土漂流幾盡甚至男婦老幼化爲魚鼈不可數計巴縣
綦江武隆長壽早魃爲虐墳塋蝨賊之災抑有甚焉耶

縣新繁溫江等處在在冲圯無麥無禾嗟半菽之不飽
靡家靡室嘆中露之堪憐矧大兵之後又重以天行之
災哀哀子遺其何堪此芻議賑則倉廩空虛旣無可施
發棠之會議蠲則兵食匱乏又孰敢倡蠲租之言古人
謂救荒無奇策亦惟今日耳請乞具題少申生靈至苦
等因通詳到臣該臣會同巡按四川監察御史溫臯謨
看得蜀本荒瘠之區頻罹兵革之苦流離困頓全未收
復所賴雨暘時若田穀豐收庶幾少救萬一而又不意
屏翳早魃一時降災如眉州新津彭山金堂青神嘉定

叙府一帶俱在大江之濱洪波陡泛無處遮藏順流衝
溺不可勝紀甚至城垣署宇俱爲倒覆巴縣綦江武隆
長壽等縣酷遭恒暘赤地千里禾苗當吐穗之時盡成
灰糝溫江郫縣新繁等縣先被驕陽復遭大水西成無
望時日尚賒葺爾遺黎將何以延一線之脈賑則積儲
盡空蠲則兵務未寧該司謂救荒無術誠可爲痛哭流
涕者也今據通詳前來容臣等痛加修省及批行合屬
嚴令各有司停刑減訟以回天意仍行各州縣將自理
贖穀稍爲賑恤外爲此具本謹具題知天啓三年十月

十六日上奉聖旨該部知道

補上陞用勞臣疏

題爲殘邊重地彈壓需人亟議陞用勞臣以便責成事
臣惟遵義新疆路逼水蘭內則舊民助逆外則安酋屢
犯郡城蕭蕭鞠爲茂草臣自昨歲倖解錦官之圍卽有
戎州之役經年臨敵應接不暇及今解嚴始得放舟東
下永寧古蘭旣已蕩掃則惟遵義一路最爲吃緊矣近
准督臣楊述中會稿欲移總兵魯欽駐鎮遵義則不必
再設大將而扼要居衝儼然有虎豹之勢地利人事委
爲兩便及查道臣僉事趙邦清先陞守北叅議又經不

祿新陞道臣侯國尚未到任該臣會同前按臣張論查
得叙馬瀘道副使李仙品見在軍前堪以委任除移檄
外本官自辛酉年六月甫任卽督兵東援及撤兵回叙
適值二賊入犯百方拮据收旣散之人心堵方張之虐
焰來復之戰追奔數百里恢復建武併南六縣嗣後或
泊江澣或入箐崖身先士卒艱苦備嘗乃其嚴毅而不
殘苛明察而更縝密經權互用操縱咸宜真得師貞之
竅繁者也取永搗藺已建奇功叅以常格自應卽寄節
鉞但二賊尚逋震鄰未戢賢者多勞勢非得已合無加

陞四川布政司右布政使責成管理該道事務馳入新
疆與總兵魯欽共相籌畫且得與臣朝夕從事在本官
爲舊游易於整頓而將士憚其威嚴更加鼓舞入地委
爲相得危苦諒所難辭理合具題伏乞勅下吏部再加
酌議將李仙品加陞四川布政司右布政使管理遵義
道事頒給應得勅書覆請行臣轉行本官遵照任事遺
下叙瀘道員缺卽以近補遵義副使侯國改補移駐建
武宣威撫輯烏蒙鎮雄問罪東川烏撒完此一面事局
庶於安攘兩有裨益等因具疏於天啓三年五月二十

七日差承差黃嘉宦齋捧具題本役行過黃河因靈雨水泛將包墜陷水中打撈方獲致將前疏濕透本役畏懼不敢投進止將咨揭投各衙門訖原疏持回該臣隨將黃嘉宦寃治外合再補題下部議覆爲此具本謹題請旨天啓三年十月十六日上奉聖旨吏部知道該本部覆奉聖旨是